

四庫全書

史部

欽定四庫全書

建康實錄卷十五

唐 許嵩 撰

齊

太祖高皇帝

太祖高皇帝姓蕭諱道成字紹伯小名鬪將漢相國何二十四代孫何初居沛何孫侍中彪免官居東海蘭陵縣中都里晉元康元年乃分東海為蘭陵郡中朝亂帝

四世祖淮陰令整過江居晉陵武進縣寓居江左者僑置本土加以南名於是為南蘭陵人也皇考承之字嗣伯少有大志而才力過人初為宋建威大將軍府叅軍累遷漢中太守追破氐帥楊難當於峨公山乃平梁州入為右軍將軍元嘉二十五年梁土思之於峨公山立廟太祖以宋元嘉四年丁卯歲生姿表英異龍顙鐘聲鱗文遍體年十三從雷次宗學於鷄籠山受禮及左氏春秋二十三年隨戍沔口初為左軍中兵叅軍二十九

年領偏軍征仇池破二壘文帝崩累遷自建康令為右將軍大破薛索兒於石梁明帝即位授南兖州刺史冠軍將軍而明帝常嫌太祖非人臣相且民間流言蕭姓當為天子明帝愈以為疑泰始七年徵赴京師拜散騎常侍太子左衛率明帝崩詔為右衛將軍加兵五百人與尚書令袁粲褚淵等共掌機事及蒼梧王立元徽二年江州刺史桂陽王休範舉兵叛於尋陽衆二萬發湓口太祖議分軍屯守出鎮自新亭單車白服宋天子加

太祖持節都督征討諸軍事平南將軍築新亭城未畢賊前驅已至太祖方解衣高卧以安衆心乃索白虎幡登西垣使將軍高道慶陳顯達浮舸與賊水戰自新亭北至赤岸大破之燒其船艦賊上新亭休範乘肩輿率衆至而太祖大破之張敬兒斬休範首而賊將丁文豪仍設伏破臺軍於皂莢橋至朱雀航而太祖使陳顯達任農夫張敬兒周盤龍等散討諸賊時休範典籤許公與等詐稱休範在新亭士庶惶懼詣壘期赴休範投名

者千數太祖得而燒之喻遣還乃振旅凱入百姓聚觀
曰全國家者此公也遷鎮軍將軍兗州刺史進爵為公
邑三千戶休範平後蒼梧王兇暴猜忌欲加大禍陳太
妃罵之曰蕭道成有功於國今若害之後誰為汝著力
也乃止太祖加憂懼後常欲以太祖臍為射的僅得免
乃與二十五人謀反與楊玉夫等同謀殺蒼梧王而迎立
汝陰王其夜王敬則馳蒼梧首於太祖太祖夜入承明
門乘所騎赤馬入殿內及太祖踐阼號此馬為龍驤將

軍世謂龍驤赤色也及沈攸之矯太后令下都京師恐
懼太祖入居朝堂命諸將西討之袁粲劉秉等謀於石
頭皆殺之秉走雒陽湖王蘊走鬪場追擒斬之粲無經
世之畧而疏放好酒步屨白楊郊野間道遇士大夫便
呼與酣飲明日謂彼知故到門求通粲曰昨飲酒無偶
聊相邀爾竟不相見初蒼梧之廢也秉出集議於路逢
弟韞曰今日之事故當歸兄耶秉曰吾等已讓領軍矣
韞自槌脅曰君內中詎有血乎詔假太祖黃鉞率大衆

出新亭中興壘以拒攸之攸之敗傳首京師進太祖太尉都督徐充等十六州諸軍事己酉增班劍四十人甲仗百人入殿加羽葆鼓吹自大明太始己來相承奢侈百姓成俗太祖輔政罷御府省二尚方諸飾翫請禁不得以金銀錦繡為緣器等九月進位領揚州牧劍履上殿入朝不趨贊拜不名置左右長史司馬從事中郎將掾屬各四人昇明三年三月甲辰詔進位相國總百揆封十郡為齊公備九錫之禮加璽紱遠遊冠位在諸王

公上加相國綠綬綬三讓公卿敦勸乃受宋帝策命詔
齊國初建給錢帛布四月癸酉進齊公爵為王衛將軍
褚淵奉策授璽紱金虎符第一至第五錫茲玄土苴以
白茅改立王社丙戌命齊王冕十有二旒建天子旌旗
出警入蹕一依天子儀辛卯宋帝禪位便遜位別官詔
依唐虞魏晉故事是日宋帝遜位東邸備羽儀出東掖
門曰何不奏鼓吹左右無有答者壬辰策命齊王遣使
持節兼太保零都縣侯褚淵兼太尉王僧虔奉皇帝璽

紱受終之禮一依唐虞故事太祖三辭宋帝王公已下
固請太史令將作匠文建陳符命曰六亢位也漢建武
至建安二十五年一百九十六年而禪魏魏自黃初至
咸熙二年四十六年而禪晉晉自泰始至元熙二年一
百五十六年而禪宋宋自永初元年至昇明三年凡六
十年咸以六終六受右僕射王儉奏被宋詔遜位臣等
叅議宜尅日與駕受禪撰立儀注太祖乃許之

建元元年夏四月甲午上即皇帝位於南郊設壇柴燎

告天禮畢車駕還宮臨太極前殿大赦天下改昇明三年為建元元年封宋帝為汝陰王築宮丹陽故縣行宋正朔車旗服色一如晉宋故事上書不為表答表不稱詔宋諸王降為公公主為縣君詔封降有差有司奏除元嘉歷為建元歷木德盛郊終未以正月郊社十二月未臘丙辰詔遣大使巡行四方己未汝陰王薨謚為順帝追尊皇考曰宣皇帝妣曰孝皇后追尊兄道度道生為王庚辰七廟主備法駕即于太廟詔諸將及客戮力

艱難盡勤直衛其從還宮者普賜位一階甲申立皇太子
子曠見刑八重者降一等立皇子凝等為王乙酉葬宋
順帝於遂寧陵秋七月詔南蘭陵桑梓本鄉長蠲租賦
武進王業所基復十年丙子立彭城劉曄為汝陰王奉
宋帝後

二年四月丙寅高麗吐谷渾遣使貢獻進高麗王高璉
為樂浪公號驃騎大將軍五月立六門都牆六月癸未
詔昔歲水旱曲赦丹陽等郡遭水尤劇之縣元年以前

三調未充虛列已畢官長局吏應共償備外詳所除宥
秋七月甲寅以輔國將軍盧紹之為青冀二州刺史九
月葬皇太子妃裴氏休安陵時議欲立石誌不出禮典
起宋元嘉中顏延之為王球石誌素族無碑策故以紀
行自爾以來王公以下咸共遵用儲妃之重禮殊恒
列既有哀策謂不須石誌從之闕黃門郎沈攸之在
荆楚宋朝密為之備至元徽四年沈攸之事起上以中
流可以待敵據湓口城為戰守之備太祖聞喜曰真我

子也齊國建為齊世子以石頭為世子宫太祖即位為
皇太子建元四年三月壬戌太祖崩上即位大赦征鎮
州郡令長軍屯部伍各行喪三日不得離任乙丑以司
徒褚淵錄尚書事左僕射王儉為尚書令車騎將軍張
敬兒開府儀同三司六月立皇太子長懋丙寅立皇太
子妃王氏八月褚淵薨

永明元年正月車駕祠南郊大赦改元內外羣僚各舉
所知而隨分登敘下詔改葬袁粲劉秉袁贊前功而沈

攸之喪柩得送反還舊墓庚申以蕭景先為中領軍甲子詔築青溪舊宮二月熒惑入太微時中書舍人各住一省時謂之四省既總重權而勢傾天下玄象失度史官請行祈禳之禮王儉曰天文乖忤此禍由四省乃具奏舍人呂文顯等專權上納而不改

二年秋八月車駕幸青溪舊宮小會金石樂作在位者賦詩戊申幸玄武湖

三年八月乙未幸中堂聽訟

四年春正月甲申藉田禮畢車駕幸閱武堂勞酒小會
五年二月戊子幸芳林園禊宴九月九日登商飈館
所立在孫陵岡世呼為九日臺也

六年春正月聽覽京師二百里內獄囚

七年五月王儉薨

八年六月大雷雨有黃光竟天照地狀如金色王融上
金天頌王擒曰此熒惑光非金也十月桃李再花占曰
人君妃妾過制虛飾無實今則桃李再花時後宮萬餘

人宮內不容

九年

十年

十一年春正月癸丑詔京師見繫囚詳所原遣以
江州刺史鄱陽鏘為領軍將軍丙子皇太子長懋薨
夏四月甲午立皇孫昭業為皇太孫立妃何氏賜天下
為父後者爵一級七月上不豫徙御延昌殿車輿始登
階而殿屋鳴咤上惡之戊寅大漸詔曰太孫進德日茂

社稷有寄子良善相毗輔尚書中務悉委王晏徐孝嗣等軍旅捍邊委王敬則陳顯達王廣之沈文季等又詔不得寶器入梓宮是日上崩年五十四廟號世祖謚武皇帝上剛毅有斷治教大體以富國為先頗好遊宴九月葬景安陵初十一年秋七月入太微先是匈奴中謠言云赤火南流喪南國於是匈奴始欲為寇帝方患而憂之是歲果有沙門從北來齎此火而至火色赤於常火熱小微可治疾貴賤爭取之多得其驗二十餘日

京師咸云聖火詔使吏澆滅之而民亦有竊畜者治病
先齋戒以火灸桃板七炷而疾愈吳興邱國賓好事士
也竊還鄉邑邑人楊道慶虛疾二十年間形容骨立依
法灸板一炷能坐即全瘥是月帝崩

史臣曰齊高帝基命之初武功潛用泰始開運大拯時
艱及蒼梧暴虐釁結朝野而百姓懍懍命縣朝夕權道
既行兼濟天下元功振主利器難以假人羣方戮力實
懷尺寸之望豈惟天厭水行固己人希木德歸功與能

事極乎此武帝雲雷伊始功參佐命雖為繼體事實艱
難御袞垂旒深存政典文武授任不革舊章明罰厚恩
皆由已出外表無塵內朝多豫機事平理職貢有常府
藏內充鮮人勞役宮室苑圃未足以傷財安樂延年衆
庶所同幸亦有齊之良王也

廢帝鬱林王

鬱林王昭業字元尚文惠太子長子也小名法身世祖
即位封南郡王戶二千永明五年十一月戊子冠於東

宮崇政殿其日小會賜王公以下帛各有差文惠薨立為
皇太孫居東宮世祖永明十一年七月崩太孫即帝位
辛酉追尊文惠為世宗文皇帝尊太妃為皇太后立何
氏為皇后初昭業年五歲戲高帝牀前方拔白髮召問
太孫曰我誰耶答曰太公高帝笑曰豈有為人曾祖拔
白髮乎即擲鏡鑷隆昌元年春正月丁未改元大赦詔
百寮陳得失各舉所知七月癸巳皇太后令廢帝為鬱
林王昭業美容止好隸書世祖勅皇孫手書不得妄出

以重之出入常禁其起居節其用度昭業嘗謂豫章王妃庾氏曰阿婆佛法言有福德生帝王家今日見作天王便是大罪左右主帥動見拘摯不如作市邊屠沽富兒百倍矣及即位極意賜與動百數十萬未朞之間世祖庫儲錢億數垂盡而開主衣庫與皇后寵姬觀之人恣意所欲取之諸寶器以相擊剖破碎之以為笑樂居常裸袒著紅縠禪雜綵袒服好聞鷄密買鷄至數千世祖御物甘草杖宮人寸斷用之與文帝幸姬霍氏淫通

長留宮內聲云度霍氏為尼以餘人代之何皇后亦淫
亂齋閣通夜洞開內外混雜西昌侯鸞屢諫不納乃疑
鸞有異志鸞懼變先謀廢帝二十二日使蕭謹坦之等
於省誅帝羽翼曹道剛朱隆之等率兵自尚書省入雲
龍門戎服加朱衣於上比入門三失履廢帝在壽昌殿
間外變走向愛姬徐氏戶拔劍自刺不中以帛綿纏頭
輿接出延德殿謹初入宿衛將士皆執弓楯相拒謹曰
所取自有人卿等不須動宿衛信之及見帝出各欲自

奮帝竟無言及被殺時年二十一輿屍出徐龍駒宅殯
葬以王禮餘黨亦見誅明日乃宣令而立海陵王

廢帝海陵王

海陵王昭文字季尚文惠太子第二子也鬱林即位封
為新安王其年鬱林廢尚書令西昌侯鸞議立昭文為
帝

延興元年秋七月丁酉即皇帝位以西昌侯鸞為錄尚
書事揚州刺史宣城郡公大赦天下改元九月癸未誅

司徒都陽王鐸大將軍隨王子隆南兗州刺史安陸王
子敬於是江州刺史晉安王子懋遂起兵遣中護
軍王玄邈討誅之己未鸞假黃鉞內外纂嚴丁酉
進宣城公鸞為太傅加殊禮進為王而盡誅諸王
為藩鎮者以宣城王輔政帝起居皆諮而後行常
思蒸魚菜太官令答無錄公命竟不獻十月辛亥
皇太后令以嗣主幼冲庶政多失宗王四海藩戚
外叛自非樹長君無以鎮淵器太傅宣城王肩體

宣皇鍾慈太祖宜入承寶命帝降海陵王建武元年詔海陵王依漢東海王故事十一月稱王有疾遣御師占視乃殞之時年十五諡曰恭王先是寶志沙門住東宮常從平昌門入忽云門限上血汚人衣褰裳走過俄而載帝屍自此門出帝頸血流于門限

史臣曰郭璞稱永昌之占二日之象而隆昌之號亦同焉案漢靈帝中平六年四月崩太子辯十歲即位改光

熹元年張讓段珪誅後改為昭寧董卓輔政改為永漢
卓廢帝為弘農王一百七十日鳩之九月立靈帝子協
却號中平一年四號也晉惠帝太平二年長沙王又事
敗成都王穎改元為永安穎自郢奔河間王復改元為
永興一歲三號也隆昌延興建武亦三號故知喪亂之
軌雖千載而必同矣

高宗明皇帝

高宗明皇帝諱鸞字景栖始安貞王道生之子也小名

元度少孤太祖撫育過於諸子宋太豫元年為安吉令有嚴能之名累遷輔國將軍淮南太守太祖踐阼遷侍中封西昌侯世祖即位為度支尚書轉左衛將軍清道而行遷左僕射海陵王立為錄尚書事鎮東府加黃鉞班劔進為宣城王太后廢帝為海陵王以上入纂太祖為第三子也羣臣三請乃受命冬十月癸亥即皇帝位大改元

建武元年大司馬王敬則等十三人並進封邑戶詔省

尚方雕刻新林苑地悉以還百姓追尊始安貞王為景
皇帝妃為懿王后丙戌以輔國將軍聞喜公遙欣為荆
州刺史寧朔將軍豐城公遙昌為豫州刺史詔諸工番
假休息戊子立皇子寶卷為皇太子賜天下為父後者爵
一級上輔政所誅諸王是月復屬籍各封子為侯

二年夏六月誅西陽南海邵陵等三王而殺蕭湛十月納
皇太子妃褚氏大赦王公已下賜有差十二月詔晉宋
諸陵悉加修理

三年冬閏十二月皇太子冠賜王公已下帛有差

四年春大赦壬寅詔人產子者蠲父母役一年新婚者
蠲夫役一年二月甲子以左僕射徐孝嗣為尚書令蕭
季敬為廣州刺史

永泰元年春正月朔大赦丁未誅河東臨賀西陽永陽
南康衡陽湘東南郡巴陵桂陽等十王子皆死之四月
甲寅改元大赦丁丑大司馬會稽太守王敬則舉兵反
夏五月使輔國將軍劉山陽東討斬敬則秋七月己酉

帝崩于正福殿時年四十七遺詔以沈文季為左僕射
江祐為右僕射封江祀侍中劉暄衛尉卿軍政大事內
外皆委徐孝嗣遙光蕭坦之等為心膂之任葬興安陵
謚明皇帝廟號高宗帝明審有吏才持法無所借制御
親幸臣下肅清驅使大存儉約輿輦舟乘剔去金銀
還主衣庫太官進食有裹蒸帝曰我食此不盡可四片
破之餘充晚食而世祖掖庭中宮服御一無所改性多
猜慮故亟行誅戮而出入互唱南出唱北東行唱西而

示簡於出入竟不南郊上初有疾信道術身衣絳衣服
飾皆赤以厭之巫云後湖水頭徑入宮內致帝有疾乃
自至太官行水溝左右啓太官若無此水則不立決意
塞之欲南引淮沔會帝崩事寢

廢帝東昏侯

東昏侯寶卷字智藏高宗第二子也本名賢高宗輔政
改爲建武元年立爲太子永泰元年七月高宗崩太子
即位改元

永元元年十一月立皇子誦為皇太子賜為父後者爵一級丙辰揚州刺史始安王遙光據東府反遣領軍蕭坦之討平之傳首九月壬戌以頻誅大臣大赦天下十一月太尉江州刺史陳顯達反十二月顯達至京師乙酉斬首餘黨盡平

二年三月詔使崔惠景討豫州刺史裴叔業及兄子植惠景時為平西將軍於廣陵起兵反襲京師徐州刺史江夏王寶元以京城納之乙卯帝使領軍王瑩屯北籬

門惠景破之遂入京師豫州刺史蕭懿起義兵大破惠
景詔曲赦京邑江夏王寶元伏誅十月害尚書令蕭懿
十一月甲寅蕭穎胄起兵於荊州十二月雍州刺史梁
王蕭衍起義兵於襄陽

三年二月詔羽林兵征雍州中外纂嚴三月丁未衍立
南康王寶融即皇帝位於江陵癸丑遣平西將軍陳伯
之西征八月以光祿張瓌鎮石頭以太子左衛率李居
士總督諸軍屯新亭是日義軍至南州李居士敗新亭

降義軍將軍徐元瑜以東府城降義軍十二月王珍國
侍中張稷率兵入殿廢帝時年十九帝在東宮便好弄
不喜書常夜捕鼠達旦為樂高宗臨崩屬以隆昌為戒
曰作事不可在人後故數誅大臣委任羣小性訥澀少
言惟親閹豎及左右自江祐始安王遙光等誅後騎馬
日夜於後堂戲叫呼倡伎以五更就卧至晡方起王侯
朝臣節朔朝見晡後方前或時遣出臺閣奏案月數十
日不報二年元會食後方出朝賀纔竟便還西序寢自

已至中百僚陪位皆僵仆菜色比起就會忽遽便罷陳
顯達平後出遊走逐居民于郊外數十里皆空家盡室
巷陌懸幔高為障置伎人防守謂之屏除或周環京邑
是時一月二十餘出三四更中鼓聲四出幡戟橫路百
姓喧走士庶不辯出不言定所夜出夜返火光照天鼓
吹鳴鉞聒地置射雉場二百十六所郊郭帷翳四民皆
廢業樵蘇路斷又於後宮起仙華神仙玉壽諸殿盡用
雕彩以麝雜香塗壁時世祖興光樓上施青漆世謂之

青樓帝曰武帝不巧何不純用瑠璃貴妃潘氏服御極
選珍異主衣庫舊物不復充用琥珀釧一隻直一百七
十萬京邑酒租皆折使輸金又立紫閣諸樓壁上畫男
女私褻之像種好樹美竹徵求民家望樹便取朝栽暮
拔道路相繼又於宮立市太官乃朝進酒肉肴菓使宮
人閹豎共為裨販潘妃為市令帝為市魁將鬪者就潘
氏判決苑中作土山築渠立堰以新蔡人徐世檟為直
閤將軍殺戮專決其黨茹法珍梅蟲兒等專權內外緘

口及義師至近郊乃聚兵為固守之計而信鬼神迎拜
蔣子文為相國揚州牧封鍾山王時范雲謂朱光尚曰
卿是天子要人當思諫諍光尚曰至尊不可諫正當以
鬼神達意後帝馬驚光尚曰先帝嗔不許數出帝大怒
乃拔刀與光尚尋覓不見乃縛草作高宗形北面斬之
懸首苑門上潘妃生女百日死帝斬衰經杖羣臣來吊
盤地坐舉手受執及將軍席豪死於是閉城自守城內
軍事一委任王珍國而聞外鼓吹叫聲披大紅袍登景

陽樓屋上望弩幾中之士卒怨之不為致力募兵出戰至城門皆坐甲自守恐城外有伏乃燒城旁府署六門之內皆盡於西掖內相聚為市販牛馬肉及義師至便勅太官備百日糧而惜金錢不肯賞賜茹法珍等叩頭請之帝曰賊來獨取我耶而就我求物後堂儲數百具榜板啟為防城之具帝曰擬修殿竟不與故王珍國張稷等見不能用計懼禍及故反率兵入殿是夜帝在含德殿吹笙歌作女兒子卧未熟聞兵入起出北戶欲還

宮闈人黃泰平以刀傷其膝仆地顧曰奴反耶直後閤
張齊遂斬首送梁王宣德太后令言其兇惡追封為東
昏侯法珍等伏誅初義師築長圍帝乃著五色衣服登
城望賊還輒與六宮御刀在華光殿共立單壘別制鎧
仗多用金玉親自攻壘詐作戰敗被瘡板擱將去將來
相對為樂

和帝

和帝諱寶融字智昭明帝第八子也建武元年封隨郡

王永元元年改封南康王出為西中郎將荊州刺史督九州軍事二年十一月甲寅長史蕭穎胄奉王舉兵其日太白及辰星俱見西方乙卯敕纂嚴丙辰以雍州刺史蕭衍為使持節都督前鋒諸軍事戊午衍表勸進十二月乙亥羣僚勸進竝不許壬辰驍騎將軍夏侯亶自建鄴至江陵稱宣德太后令西中郎將南康王宜纂承皇祚光臨億兆可且封宣城王相國荊州牧加黃鉞置僚屬三年正月乙巳王受命大赦唯梅蟲兒茹法珍等

不在例是日長星見竟天甲寅建牙于城南二月己巳
羣僚上尊號立宗廟及南北郊中興元年春三月己巳
皇帝即位大赦改永元三年為中興文武賜位二等是
夜彗星竟天以相國左長史蕭穎胄為尚書令加雍州
刺史蕭衍尚書左僕射都督征討諸軍以晉安王寶義
為司空廬陵王寶源為車騎將軍開府儀同三司丙午
有司奏封庶人寶卷為零陵侯詔不許又奏為涪陵王
詔可夏四月戊辰詔凡東討衆軍及諸向義之衆普復

除五年秋七月丁卯魯山城主孫樂祖以城降己未郢
城主薛元嗣降八月丙子平西將軍陳伯之降九月己
未詔假黃鉞蕭衍若定京邑得以便宜從事冬十一月
壬寅尚書令鎮國將軍蕭穎胄卒十二月丙寅建康城
平己巳宣德皇太后令以征東大將軍蕭衍為大司馬
錄尚書驃騎大將軍揚州刺史封建安郡公依晉武陵
王遵承制故事壬申改封建安王寶夤為鄱陽王癸酉
以司徒揚州刺史晉安王寶義為太尉領司徒乙酉以

尚書右僕射王瑩為左僕射

二年春正月戊戌宣德皇太后臨朝入居內殿壬寅大司馬蕭衍都督中外諸軍事加殊禮己酉以大司馬長史王亮為守尚書令甲寅加大司馬蕭衍位相國梁公備九錫禮二月壬戌誅湘東王寶暕丙戌進梁公蕭衍爵為王三月辛丑鄱陽王寶夤奔魏誅邵陵王寶攸晉熙王寶貞庚戌車駕東歸至姑孰丙辰遜位于梁丁巳廬陵王寶源薨四月辛酉禪詔至皇太后遜居外宮梁

受命奉帝為巴陵王宮于姑孰戊辰巴陵王殂年十五
追尊為齊和帝葬恭安陵初梁武帝欲以南海郡為巴
陵國邑而遷帝焉以問范雲雲俛首未對沈約曰今古
殊事魏武所云不可慕虛名而受實禍梁武領之於是
遣鄭伯禽進以生金帝曰我死不須金醇酒足矣乃引
飲一升伯禽就加摺烏先是文惠太子與才人共賦七
言詩句後輒云愁和帝至是其言方驗又永明中望氣
者云新林婁湖青溪並有天子氣於其處大起樓苑宮

觀武帝屢游幸以應之又起舊宮於青溪以弭其氣而
明帝舊居東府城西延興末明帝龍飛至是梁武帝衆
軍城於新林而武帝舊宅亦在婁湖百姓皆著下屋白
紗帽而反裙覆頂東昏曰裙應在下今更在上不祥命
斷之於是百姓皆反裙向下此服妖也帽者首之所寄
今而向下天意若白元首方為猥賤乎東昏又令左右
作逐鹿帽形甚窄狹後果有逐鹿之事東昏宮裏又作
散叛髮反髻根向後百姓爭學之及東昏狂惑天下散

叛矣東昏又與羣小別立帽騫其口而舒兩翅名曰鳳
度三橋扇向後摠而結之名曰反縛黃麗東昏與刀敕
之徒親自著之皆用金寶鑿以壁璫又作著調帽鏤以
金玉間以孔翠此皆天意梁武帝舊宅在三橋而鳳度
之名鳳翔之驗也黃麗者黃離為日而反縛之東昏戮
死之應也調者梁武帝至都而風俗和調先是百姓及
朝士皆以方帛填冒名曰假兩此又服妖假非正名也
儲兩而假之明不得真也東昏誅其子廢為庶人假兩

之意也

史臣曰鬱林地居長嫡瑕釁未彰而武皇之心不變周
道故得保茲守器正位尊極既而愆鄙內作兆自宮闈
雖為害不遠而足傾社稷郭璞稱永昌之名有二日之
象隆昌之號實亦同焉明帝越自支庶任當負荷乘機
而作大致殲夷流涕行誅非云義舉事苟非安能無內
愧既而自樹本枝根胤孤弱貽厥所授屬在凶愚用覆
宗祊亦其理也夫名以行義往賢垂範備而之禪衍士

誠之東昏以卷矣藏以終之其兆先徵蓋亦天所命矣

列傳

柳世隆字彥緒河東解人也祖憑世隆少有風器伯父元景為宋尚書令愛賞之言於宋孝武召見帝曰此兒將來復是三公也宋累遷虎威將軍上庸太守帝謂元景曰卿昔以虎威之號為隨郡今復以授世隆使卿門世不絕公也以沈攸之叛守郢城有功事定徵為侍中遷尚書右僕射貞陽侯齊太祖踐阼自母憂起為平南

將軍豫州刺史進為公帝問褚淵曰向見柳世隆毀瘠
過禮使人惻然淵曰世隆至性天深喪過乎禮事陛下
在危盡忠喪親居憂杖而後起立人之本二理同極加
榮增寵足以勵風俗世隆性好書啟太祖借祕閣書上
給二千卷轉尚書令常自云馬稍第一清談第二彈琴
第三在朝不干世務垂簾鼓琴風韻清逸甚得世譽以
疾遜位永明九年卒詔給東園祕器朝服贈司空班鼓
吹葬於倪塘著龜經祕要二卷見行於世

張瓌字祖逸吳郡吳人也祖裕為宋金紫光祿大夫父永為右光祿曉音律宋孝武問永太極殿前鍾聲嘶永荅鐘有銅滓乃叩鐘求其處鑿而去之聲遂清越瓌解褐江夏王太尉府參軍以遭父喪還吳初劉彥節有異圖弟遐為吳郡守聚師三千太祖密遣瓌取遐瓌領兵直入吳郡斬遐郡內莫敢動太祖以告張冲冲曰瓌以百口一擲出手得盧矣即授吳郡太守封義成縣侯世祖即位為左尚書領右軍及鬱林之廢見朝廷多難恒卧

疾而居室妓妾盈房生子十餘人嘗云中應有好者梁
天監中卒

垣崇祖字敬遠下邳人也族姓豪彊石季龍時自洛陽
徙鄴曾祖敞為慕容吏部尚書祖苗自宋武征廣固率
衆歸降仍家下邳官龍驤將軍父詢之宋冀州刺史崇
祖年十四有幹略伯父豫州刺史護之謂門宗曰此兒
必大吾門汝等不及也太祖在淮陰崇祖時戍朐山既
受都督祇奉甚至及平沈攸之復遷冠軍將軍兗州刺

史初下邳見太祖謂妹夫皇甫肅曰此真吾君也太祖亦曰韓白不及太祖踐阼為豫州刺史鎮壽春盡力奉邊建元二年虜遣劉昶馬步號二十萬寇壽春崇祖著白紗帽肩輿登城指揮大破虜軍啟至上笑曰今真得其人矣進平西將軍崇祖聞陳顯達增給軍儀乃啟上求鼓吹上勅曰韓白何可不與遂給鼓吹一部世祖即位徵還為五兵尚書永明元年詔稱與荀伯玉構扇邊荒誅之時年四十四子惠隆徙番禺卒

張敬兒南陽冠軍人也本名苟兒宋明帝以其名鄙改
之父醜為蜀郡將軍敬兒年少便弓馬有膽氣射猛獸
發無不中以補府將擊蠻賊累功為南陽太守後佐太
祖大破桂陽王於新亭親詐降斬休範首以功遷為雍
州刺史驍騎將軍以平沈攸之封襄陽侯太祖即位為
中軍將軍太祖崩遺詔加開府儀同三司將拜謂其妻
曰我拜後府開黃閣因口自為鼓吹聲其妻謂曰吾嘗
時夢一手熱如火而君為南陽郡元徽中夢半身熱而

君得本州今復夢舉身熱矣有閹人聞之以事達世祖
世祖疑有異志使收之敬兒脫冠投地曰用此物誤我
於是伏誅子道慶見宥

王敬則晉陵南沙人母為女巫敬則生而胞紫色謂人
曰此兒必有鼓角相人笑曰得為人吹角可矣及年長
兩腋下生乳各長數寸夢騎五色獅子年二十餘善拍
張好刀劍補刀戟跳刀高與虎幢等如此五六接無不
中宋明帝即位為直閣將軍封重安縣子敬則少於草

中遇蟲如烏豆集其身摘去乃脫其處皆流血敬則惡之詣道士卜云此封侯之瑞也果如其言出補暨陽令性倜儻不羈初屠狗商販徧於三吳嘗與暨陽縣吏鬪曰我得暨陽當鞭汝小吏背吏唾其面曰汝得暨陽我亦得司徒公矣及作暨陽召吏謂曰汝何時得司徒公邪竟善遇之及佐破桂陽王遂盡力於太祖太祖即位以殺蒼梧功遷安東將軍吳興太守封潯陽郡公世祖十一年累遷司空出為會稽太守初在吳興出行市見

屠肉析歎曰吳興昔無此析是我少時在此所作也海陵王立進位太尉敬則名位雖達不以富貴自遇初為散騎使虜於北館種楊柳後貲外郎虞長曜北使還敬則曰我昔種楊柳今若大小長曜曰北人以為甘棠敬則從世祖嘗宴於華林羣臣各出妓敬則脫章服袒髀以片絹紉髻奮臂拍張叫動左右上不悅曰豈聞三公為此對曰臣拍張故得三公而拍張當時以為名譽明帝即位為大司馬臺使拜授日而雨大洪注敬則不悅及

使蕭坦之將齋仗五百人行武進陵敬則憂惶上知使
敬則世子仲雄入東安慰其父雖然愈益猜忌高宗疑
爲後竟起兵反過浙江帝諸子在京者盡殺之遣將軍
左興盛等討之敬則遇興盛遙告敬則曰公兒死已盡
公持許底作官軍不敵欲退馬軍主胡松領馬軍突之
敬則大敗興盛軍客袁文曠斬之傳首京師時年七十
初敬則東起高祖疾篤朝廷倉卒東昏侯在東宮議欲
叛使人上屋見征虜亭失火謂敬則至急裝欲走或有

告敬則者敬則曰檀公三十六策走是上策汝父子唯應急走耳蓋諺云檀道濟避虜也

陳顯達南彭城人宋孝武世為張永前軍幢主景和中以勞驅使累遷濮陽太守桂陽王反大敗賊丁文豪等於杜姥宅矢中左眼拔而鏃不出地黃村潘嫗者善禁先以釘釘柱嫗禹步作氣釘即出乃禁顯達目中鏃出以功封彭城侯再遷平越中郎將廣州刺史太祖即位為安西將軍益州刺史山夷震服永明八年徵為征南

大將軍江州刺史給鼓吹顯達性謙厚多智計有子十人誠之曰我本不及此汝勿以富貴陵人高宗之世進位太尉都陽公常不自安每自卑下及北討督平北將軍崔惠景等圍馬圈城四十日入據城而魏孝文帝率十萬騎自至齊軍敗顯達走軍主崔恭祖胡松以烏布幔盛顯達僅獲免以為江州刺史鎮湓城東昏立無道殺害賢良顯達懼禍十一月遂舉兵朝廷遣胡松等拒於采石大破之松軍敗京邑震駭遂於新林多置屯火

於岸十二月潛軍夜渡取石頭入宮城與官軍戰於西
州顯達敗走西州烏榜村騎官趙潭注稍刺落馬斬於
籬門側血灑蒲籬似溲予伯之被刑也時年七十三諸
子皆伏誅

劉懷珍字道玉平原人漢膠東王後伯父奉伯為宋陳
郡太守懷珍幼隨奉伯在壽陽時刺史出獵百姓觀之
懷珍獨避不視伯父異之曰此兒方興吾宗也本州辟
主簿自宋文以來數有軍功遷至將軍封中宿侯太祖

輔政以布衣之舊徵為相國左司馬建元初改封宣城侯而尋轉光祿大夫子靈哲字文明累遷至前將軍兗州刺史母病靈哲躬祈禱夢見黃衣公曰可取南山竹笋食之靈哲覺如其言乃立愈

李安民蘭陵承人也父欽之殿中將軍隨父沒虜率部曲自拔南歸累遷冠軍司馬廣陵太守初討晉安王子勛事平明帝大會新亭勞諸軍主簿補官賭而安民五擲皆盧帝大驚帝自謂安民曰卿面方如田封侯相也

及太祖即位為中領軍封康樂侯家國密事太祖唯與安民論議每謂曰署事有卿名我便不復細覽也世祖即位遷尚書僕射以疾辭退為安東將軍吳興太守吳興有項羽神護郡廳事太守至必先殺軀下牛祭安民奉佛不與牛祭而設八關齋俄而牛死埋於廟側今呼為李公牛塚也

王元載字彥休下邳人也建元二年為梁秦二州刺史兄弟同時為方伯封河陽侯永明四年卒

崔祖思字敬元清河東武城人也魏中尉琰七世孫祖
諱宋冀州刺史父僧護州秀才祖思少有志氣好讀
書初辟州主簿與刺史劉懷珍於堯廟祀神廟有蘇
侯像與堯偶坐懷珍曰唐堯聖人而與雜神同列去之
何如祖思曰使君若清蕩此坐則是堯廟重去四凶之
伍也遂相與除雜神太祖在淮陰祖思聞風自從之及
宋初議封太祖為梁公祖思啓太祖曰讖云金刀利刃
齊刈之今宜稱齊實應天命從之太祖即位遷征虜將

軍青冀二州刺史因啓陳政事上優詔報荅尋遷寧闕

宋孝建中為後軍叅軍事太祖累遷寧國將軍東海太守榮祖善彈登西樓見海鵠羣翔謂左右當生取之於是彈其兩翅毛脫盡墜地無傷養毛生後飛去其妙如此佐命勲封將樂縣子永明二年遷冠軍兗州刺史九年卒

呂安國廣陵人也宋大明末以將領見任隱重有幹局副劉劬破殷琰於壽陽以功第一封彭澤男累以軍功

遷金紫光祿大夫給事中永明九年卒

周山圖字季寂義興義鄉人也貧微於書題甚拙不事產業有器幹以軍功累遷左中郎將衆稱其勇呼為武原將以佐太祖輔政出征有功封晉興縣男世祖即位遷竟陵王鎮北司馬及疾上手敕問疾尋卒

周盤龍北蘭陵人也盤龍膽氣過人尤便弓馬隨軍討擊陷陣先登累遷龍驤將軍封晉安子建元二年助垣崇祖拒魏大破之上聞大喜送金釵二十枚與盤龍愛

妾杜氏手敕曰餉周公阿杜轉太子左率敕令助成買
與虜拒戰於淮陰甬城父子二人衝突出入縈擾數萬
衆遷平北將軍兗州刺史後為光祿大夫世祖戲之曰
卿著貂蟬何如兜鍪對曰此貂蟬從兜鍪中出病卒子
奉叔勇力絕人少隨父征討得直閤將軍善騎馬鬱林
從其學騎後遷冠軍將軍青州刺史後為高宗所殺
王廣之字林之沛郡相人也少好弓馬有勇力初為馬
隊主累遷左衛將軍世祖見其子珍國異之曰珍國大

堪事卿可謂老蚌卒於江州刺史進應城公

薛淵河東汾陰人也宋徐州刺史安都從子本名道淵避太祖偏諱改焉安都降虜而親族皆入北太祖鎮淮陰淵來奔委身事太祖隆昌元年封司州刺史卒

戴僧靜會稽永興人也少有膽力便弓馬初祖飾謀亂伏法家口徙青州僧靜自歸太祖為北徐州刺史徙高平太守卒

桓康北蘭陵承人也勇而驍果宋末隨太祖及世祖起

義為郡所繫衆皆散而康褒擔一頭貯穆后一頭貯文惠太子及竟陵王子良自負置山中與門客蕭欣祖四十餘人相結破郡獄出世祖郡兵追急康死戰破之隨世祖起義摧堅陷陣膂力絕人所經村邑恣其行暴江南人畏之以其名怖小兒畫其形而辟瘡無不立愈建元元年封吳平縣伯後軍將軍明年大破魏虜為持節都督青州刺史卒

焦度字文續南安氐人也祖文珪避難奔喪居仇池元


嘉中僑立天水郡洛陽縣乃屬焉度少有器幹便弓馬
孝武初青州刺史顏師伯出鎮滑臺差度領幢主送之
後破虜有功拔為輔國府參軍孝武見而謂師伯曰真
健物也補晉安王子勛夾轂隊主子勛起兵以度為龍
驤將軍事敗逃於宮亭湖中為賊江州刺史王景文誘
降之沈攸之事起拒攸之於郢城登樓罵辱攸之攸之
攻不能下至今呼此樓為焦度樓事寧後以功為直閣
將軍封東昌縣子

庾杲之字景行新野人祖深之雍州刺史父粲司功叅
軍杲之幼有孝行起家奉朝請累至王儉衛軍府長史
蕭緬與儉書曰盛府元僚實難其選景行汎綠水依芙
蓉何其麗也世呼儉府為芙蓉池故緬書美之也轉黃
門侍郎杲之風範和潤善音吐世祖令對虜使歎其風
姿之美王儉在坐曰杲之為蟬冕所照更生光彩遷左
衛率上表退蟬冕及章上不許杲之從孫襲家富於財
狀兒豐美頤頰開張人皆以為有方伯之任無凍餒之

憂後江陵亂竟餓死又有都督褚蘿面有毛從理入口
竟不乏衣食而終

高帝十九男昭皇后生武帝及豫章文獻王嶷謝貴嬪
生臨川獻王映長沙威王晃羅太妃生武陵昭王暕
任太妃生安成恭王暕陸脩儀生鄱陽王鏘晉熙王鉊
袁修容生桂陽王鐸何太妃生始興簡王鑑宜都王鉉
歐貴人生衡陽王鈞張淑妃生江夏王鋒河東王鉉李
美人生南平王銳第九第十三第十四第十七皇子早

亡衡陽王鈞出繼元王後



建康實錄卷十五

欽定四庫全書

史部

建康實錄卷十六

七

詳校官編修臣李潢

編修臣裴謙覆勘

總校官進士臣

朱鈐

校對官中書臣

陳木

謄錄監生臣

李維翰

欽定四庫全書

建康實錄卷十六

唐許嵩撰

齊

列傳

王琨瑯琊人祖蒼父懌以侍婢生初琨名崑崙懌後娶
南陽樂元女無子故名琨立為嗣少謹篤為從伯父司
徒謚愛重官至尚書初為吏部郎不受私囑出為建威

將軍平越中郎將廣州刺史宋順帝即位進右光祿大夫順帝遜位百僚陪列琨攀畫輪豹尾慟泣曰人以壽為歡老臣以壽為戚既不能先驅螻蟻頻見此事嗚噎不自勝百官人人雨淚齊高帝即位領武陵王師加侍中時王儉為宰相屬琨用東海郡迎吏琨使謂曰語郎三臺五省皆是郎用人外方小郡當乞寒賤省官何容復奪之遂不過其事尋解王師及高帝崩琨聞國諱牛不在宅去臺數里遂步行入宮朝士皆謂曰故宜待車

有損國望琨曰今日奔赴皆自應爾遂得病卒贈左光祿大夫年八十四琨謙恭謹慎老而不渝朝會必早起簡閱衣裳料數冠幘如此數四或為輕薄所笑

何戢字惠景廬江潛人祖尚之宋司空父偃金紫光祿大夫戢尚宋孝武山陰公主主就帝求褚淵內侍淵乃與戢同居歲餘終不從主意由是厚申情好累至吏部尚書戢美容儀動止與褚淵相慕時人呼為小褚公初孝武賜戢蟬雀扇善畫人顧景秀所畫時吳郡陸探微

顧彥先皆能畫嘆其巧絕戢因王晏獻之上令晏厚酬其意卒年三十六

王延之字希季瑯琊人父昇之宋都官尚書延之出繼伯父榮之從少靜默不交人事舉秀才累至吳郡守入為左僕射宋祚衰太祖輔政朝野之間人懷彼此獨延之與王僧虔中立無所去就世人語曰二公治平不送不迎太祖善之出為安南將軍江州刺史與阮韜俱是宋領軍劉湛外甥並有才譽湛愛之曰韜後當為第一

延之次焉延之甚不平遷中書令轉特進卒子綸之位至侍中

阮韜字長明陳留人也晉散騎常侍金紫光祿大夫裕玄孫也初宋孝武選侍中四人須有風貌王或謝莊為一雙韜與何偃為一雙常充兼假領始興王師永明二年卒

張緒字思曼吳郡人祖茂度會稽太守父寅太子中舍人緒少知名叔父鏡謂人曰此兒今世樂廣也舉秀才袁粲言於明帝曰臣觀思曼有正始之遺風宜為宮

職拜侍中中書齊建元元年轉中書令王儉嘗謂人曰
北士中覓張緒過江未有也不知陳仲弓黃叔度能過
之否劉俊之為益州刺史獻蜀柳數株枝條甚長狀若
絲縷帝命植於太昌靈和殿前因宴翫賞咨嗟曰此柳
風流可愛甚似思曼少年以緒為太常卿國子祭酒用
王延之代緒為侍中中書令世人以此選得人比晉朝
用王子敬代王季琰也世祖位為吏部尚書初緒每朝
見太祖目送之謂王儉曰緒以位尊我我以德貴緒緒

口不言利家不蓄財不受私囑若清談端坐或竟日不食卒年六十八遺命作蘆葭輜車靈床置杯水香火從弟融敬重事之如親兄置酒於靈前酌酒慟哭曰阿兄風流頓盡子克嗣

虞玩之字茂瑤會稽人祖宗晉庫部郎父孜通直常侍玩之少閑刀筆涉書史官至左丞上表陳府庫錢帛器械用度慮不支歲月太祖輔政鎮東府朝廷致敬玩之猶躡屐造席太祖取屐視之訛黑斜銳莖斷以芒接之問曰卿此屐已幾載玩之曰三十一年

矣初拜征北行佐所買貧士竟未辦易太祖善之因賜
新履不受曰著精日久弊不可捐所以不當殊賜累位
驍騎將軍黃門侍郎世俗多巧偽玩之請置校籍官以
防之年老有疾請退表曰四十仕進七十懸車壯即驅
馳老宜休息知足不辱臣知足矣授命於道消之辰効
節於百揆之日忠之効也慶隆於文明之初荷澤於龍
飛之運命之偶也不謀巧宦而位至九卿德慚李陵而
忝居門下堯舜無窮民臣亦通矣年過六十不為天矣

榮期之三樂東平之一善臣俱盡之矣上省表許之東
歸王儉不出送朝廷無祖餞者歸鄉造大宅數年後卒
負外郎孔瑄就儉求會稽王官儉方盥漱投皂莢於地
曰鄉鄉俗惡虞玩之至死煩人

劉休字引明沛郡人父超九真太守休初為宋明帝東國
常侍轉征北叅軍帝頗有好尚尤嗜飲食休多藝能爰至鼎
味問無不解遂見親賞長直殿內帝素肥瘠不能御內諸
王妓妾懷孕者密使獻之入宮生子乃幽其母順帝是桂

陽王休範子蒼梧王亦非帝子乃陳太妃先為李道兒妾
故後蒼梧王微行每自稱曰李將軍帝憎婦人妬忌朝官
妻有妬者必為鞭捶休妻王氏亦妬帝使人就宅鞭二十
後令開小店使王氏賣掃帚皂莢以辱之休卒豫章太守
謝超宗陳郡陽夏人祖靈運父鳳宋元嘉中因事徙廣
州超宗元嘉末方還好學有文章與惠休道人往來孝
武出策秀孝格五問並得為上作殷淑儀誄孝武見歎
曰超宗殊有鳳毛恐靈運再出為太祖長史坐公事免

自詣東府門通謝其日風寒慘厲太祖謂四坐曰此客
至使人不衣自煖矣超宗即坐飲酒數甌辭氣橫出太
祖對之甚懽太祖即位轉黃門侍郎在直省常醉上忽
召見語及北方事超宗曰虜動來二十年佛出亦無奈
何以失儀出為南郡王司馬後以怨望免官十年禁錮
後司徒褚淵送湘州刺史王僧虔閣道壞墜水僕射王
儉失驚跳下車超宗撫掌笑曰落水三公墜車僕射前
後言誚布在朝野及淵出水沾濕超宗又笑曰有天道

馬天所不容地所不受投畀河伯河伯不用淵大怒曰
寒士不遜趙宗曰不能賣袁粲焉得免寒士以張敬兒
女為子妻帝甚疑之及收下廷尉一宿髮盡白詔徙越
州自盡

劉祥字顯微東莞莒人父散太宰從事祥為宋巴陵王
叅軍少好學性剛疎輕言肆行不避高下建元中司徒
褚淵入朝以腰扇鄣日祥從側過曰作如是舉止羞面
見人扇障何益撰宋書譏斥之為臨川王驃騎從事初

王奐為僕射與奐子融同載行至中堂見路人驅驢祥
曰驢汝好為之如汝人才皆可為令僕矣著連珠詞十
五首以寄懷云希世之寶違世必賤偉俗之器無聖則
淪是以明璧黜於楚岫章甫窮於越人上令御史任遐
奏付廷尉徙廣州不得意縱酒而卒

虞琮字景豫會稽餘姚人父秀之黃門侍郎琮有謹行
初世祖始為從事家甚貧薄琮推國士之眷數相分與
行必呼帝同載上甚德之昇明中為世祖中兵諮議家

富奴婢無游手者雖在南土而會稽滋味無不畢至及
明帝即位琮乃辭疾不陪位帝使尚書令王晏齋廢立
事示琮以琮舊德引參佐命琮謂晏曰主上聖明公卿
戮力寧假朽老臣贊惟新乎不敢聞命徐孝嗣曰此亦
古之遺直也衆議乃止稱疾篤求東歸轉光祿大夫卒
蕭赤斧南蘭陵人太祖從祖弟父始之冠軍參軍赤斧
歷官謹慎為太祖所知太祖輔政順帝遜位于丹陽故
所立宮上令赤斧監送至薨乃還遷雍州刺史在公勤

奉公事封南豐伯永明三年卒家貧無絹為衾上聞之
轉賻錢五萬材一具布百匹子穎胄字雲長弘厚有父
風起家太子舍人從太祖登石頭烽火樓賦詩稱旨和
帝出荊州以穎胄為冠軍將軍行荊州事初雍州刺史
梁王起義書與穎胄勸同舉兵穎胄未決而朝廷使巴
西太守劉山陽領兵三千上荊州就穎胄謀襲雍州梁
王又使王天虎等揚聲云劉山陽西上并襲荊雍遂與
梁王定謀斬天虎首送山陽發兵及百姓車牛往襄州

山陽上就潁胄潁胄使岷山太守劉孝慶伏兵斬山陽
首送梁王梁王發兵留潁胄知後事檄告京師永元三
年正月立和帝於荊州初荊州大風雨龍入栢齋中柱
壁上有爪足處刺史蕭遙欣恐不敢居至是南康王寶
融立為和帝遂以為嘉瑞殿中興元年三月遷潁胄為
中書令領吏部監八州軍事荊州刺史八月魯休烈蕭
瓚破汶陽至上明荆土尚振潁胄遣軍主蔡道恭假
節屯上明拒瓚十二月潁胄憂慮發氣卒和帝密詔梁

王報穎胄凶秘不發喪年始四十及城平定識者聞之知天命之有在矣梁天監元年追封巴東郡公

劉瓛字子珪沛國相人晉丹陽尹惔六世孫父惠治書御史瓛初舉秀才丹陽尹袁粲坐在後堂指庭前柳樹謂曰人謂此是劉尹時樹每想高風今復見卿清德可謂世不衰矣薦為秘書郎太祖即位累至總明觀祭酒會稽郡丞從學者數百人瓛姿狀纖小而名冠當朝京師士子莫不下席受業瓛性謙下不以高名自處居住

檀橋有屋數間上皆穿漏學徒不敢指斥呼為清溪馬
竟陵王子良親往謁之表世祖為立館以楊烈橋故主
第給之生徒皆賀瓛曰室美豈為人哉華宇豈吾宅也
未徙居遇疾卒年五十六瓛有至性年四十未有婚對
後娶王氏尋又出之梁天監中武帝為立碑謚曰貞簡
先生

弟璉字子敬性方軌正直初為武陵王煜叅軍煜與寮
佐飲自割鶩炙璉曰殿下親執鑾刀下官未敢安席因

起請退嘗與友人孔徹同舟徹留日觀岸上女子璉舉
席自隔不與同坐兄璉嘗夜隔壁呼之璉初不應答方
下牀著衣行及簾外然後應之璉恠其久璉曰向者束
帶未竟恐乖禮也卒射聲校尉

陸澄字彥淵吳郡人祖劭臨海太守澄少好學行坐眠
卧手不釋卷起家太學博士以評議經典遷祕書監初
竟陵王子良得古器小口方腹而底平可容七八升以
問澄澄曰此名服匿昔單于以與蘇武子良後細視器

底有字髣髴可識如澄所說以老疾轉光祿大夫卒年七十世稱碩學讀易三年不解文義欲撰宋書竟不成王儉戲之曰陸公書厨也

張融字思光吳郡人父暢宋會稽太守融年弱冠同郡道士陸修靜以白鷺羽塵尾扇遺融曰此既異物以奉異人仕宋為封溪令被獠賊執將欲殺之融神色不動方作洛生詠賊異之而不害嘗泛海至交州於海中遇風終無懼色方詠曰乾魚自可還其本鄉肉脯復何為

者哉又作海賦還示顧愷之愷之曰此賦實超元虛但恨不道鹽耳融立取筆注之曰漉沙構白熬波出素積雪中春飛霜暑路此四句後足也融嘗與王僧虔書曰融天地之逸民也進不辯貴退不知賤兀然造化忽若草木每自歎曰不恨我不見古人恨古人不見我善草隸書自號其能太祖尤善之見融常笑曰此人不可無一不可有二與何戢善常往詣戢為從者誤通尚書劉澄宅融入門乃曰非是至戶外望澄又曰非是既造席

熟視澄良久曰都不是乃出其為異如此遷司徒從事
中郎假東出世祖問所住止曰臣陸居無屋舟居無水
上問融從兄緒緒曰融近東出未有居處權牽小船於
岸上住上大笈北虜聞融名上使融往對北使李道固
曰張融是宋彭城長史張暢子否融頓蹙久之曰先君
不幸名播六夷豫章王大曾賓寮融食炙始畢行人便
去融欲求鹽蒜口終不言方搖食指半日乃息出入朝
廷皆拭目觀之性孝義母忌月三旬皆不聽音樂司馬

竺超民嘗救其父暢之難後超民有孫微冬月遭母喪
家貧融往弔之悉脫身上衣以賻之披牛衣而還建武
四年卒

周顥字彥倫汝南安城人晉光祿大夫顥七世孫祖虎
頭貞外散騎常侍父恂顥少為族祖朗所知府臺立為
殿中郎音辭雅麗出言不窮尤長佛理著三宗論嘗於
鍾山西立隱舍休沐則歸之清貧寡欲終日長蔬雖有
妻子獨處山舍甚機辯衛將軍王儉謂顥曰卿山中何

所食顯曰赤米白鹽綠葵紫蓼文惠太子問顯菜食何
味最勝顯曰春初早韭秋末晚菘轉國子博士兼著作
太學諸生慕其風爭事華辯始著四聲切韻行於時後
卒於官

蕭坦之南蘭陵人也父欣有功於世祖至武進令坦之
與蕭詵同族初為殿中叅軍以文惠見用累位侍中領
軍高宗崩東昏立而始興王遙光謀反坦之自淮南岸
夜踰牆科頭著視走歸宮城假節督衆軍討遙光屯湘

宮寺事平遷尚書左僕射丹陽尹進封公二十餘日帝使延明主帥黃文濟領兵圍其宅誅之坦之肥黑無鬚語聲嘶時人號蕭啞剛狼專執羣小畏而憎之

謝瀹字義潔陽夏人祖宏微宋太常父莊金紫光祿大夫瀹七歲王或見而異之言於宋孝武褚淵以女妻之初兄肱為吳興郡瀹送別肱指瀹口曰此唯宜飲酒故建武朝專以長酣為務方得壽終瀹拜車騎參軍以明帝廢鬱林即位宴羣臣尚書令王晏等與席瀹獨不起

曰陛下受命應天從人王晏以為己力獻觴遂不見報
上大笑解之及王晏初得班劍瀹謂之曰身家太傳裁
得六人君亦何事一朝至此晏甚憚之謂江祐曰彼上
人者難為酬對帝起禪靈寺敕瀹為碑文永泰元年卒
徐孝嗣字始昌東海郟人祖湛之父聿之並為宋元兇
所殺初孝嗣在孕母年少欲更嫁不願有子自牀投地
及服藥令胎墜而更堅及生小字遺奴而挺立風儀端
簡年八歲襲爵枝江縣侯尚孝武樂康公主除著作郎

太祖建元初兼侍中王儉目之為宰相才轉御史中丞累至吏部尚書臺閣事悉以委之王儉卒後為五兵尚書明帝謀廢鬱林孝嗣奉旨即還家草太后令戎服隨入殿庭於袖中出太后令明帝大悅即位後加中軍大將軍定策元勲進爵為公孝嗣性好學器量宏雅不以權勢自居建元之世恭己自保朝野稱之孝嗣初在率府晝卧齋北壁下夢兩童子遽云移公牀驚起走數步壁尋崩墜牀建武四年加開府儀同三司明帝崩受遺託

輔幼主東昏即位多失德孝嗣不敢諫之江祐見誅內懷憂懼進拜司空初虎賁中郎將許準有膽力領軍隸孝嗣陳說事機勸行廢立孝嗣弗能決羣小反憎惡遂勸帝除之其冬被召之華林省遣茹法珍賜藥酒孝嗣容色不變少能飲酒飲藥至斗餘卒年四十七長子尚世祖女永康公主第三子尚明帝女山陰公主並同見殺中興元年和帝詔贈孝嗣太尉子緄緄子君倩仕梁湘東王嘗出軍有人將婦從役王曰才愧李陵未能先

誅女子將慙孫武遂欲驅戰婦人君倩應聲曰項籍壯士猶有虞兮之歌紀信成功乃資姬人之力竟卒於官

沈文季字仲達吳興武康人父慶之宋司空孝建二年文季起家州主簿景和之難兵人圍宅文季揮刀馳馬而去收者不敢逼遂得免明帝立遷黃門侍郎文季飲酒至五斗妻王錫女亦飲三斗對飲竟日而視事不廢風彩稜岸善於進止昇明元年沈攸之反文季為冠軍

將軍督錢塘軍事文季殺攸之弟及宗族盡滅之銜景和之害也齊建元初為太子右衛率封南豐侯世祖即位轉太子詹事世祖謂文季曰南土無僕射多歷年所文季對曰南風不競非復一日尤善應對能博簊及彈碁簊用五子也遷中護軍以家為府延興元年遷左僕射明帝加尚書令東昏即位多行殺戮方知世亂乃辭以老病後與徐孝嗣見害於華林省年五十八朝野冤之和帝中興追贈司空兄子昭略至冠軍將軍與文季

同召入省例賜藥酒昭略罵徐孝嗣曰廢昏立明古今
令典宰相無才致有今日即以甌投其面曰使作破面
鬼死時言笑自若年四十餘弟昭光亦見殺

王慈字伯寶瑯琊人司空僧虔子年八歲外祖宋江夏
王義恭於內齊施寶物恣任所取慈乃取素琴古硯義
恭善之累位侍中以脚疾齊武帝勅聽乘車在仗後自
江左以來少此例也子觀尚世祖女吳縣長公主慈至
冠軍將軍東海太守有女為江夏王緯妃謝鳳子超宗

嘗候僧虔仍往東齋詣慈慈正學書超宗曰卿書何如
虔公慈曰我不及有如鷄之比鳳超宗狼狽而退永明
九年卒贈太常

陸惠曉字叔明吳郡吳人晉太尉玩之玄孫也自玩至惠
曉祖萬載世為侍中皆有名行惠曉伯父仲元又為侍
中時人方之金張二族父子真仕宋為海陵太守惠曉
清介正直不雜交遊張緒常曰此江東裴秀樂廣舉秀
才歷諸府叅軍世祖輔政除尚書殿中郎隣族來賀惠

曉舉酒曰陸惠曉年踰三十婦父領選始作尚書郎卿等以為慶耶自太傅祭酒出為武陵王征虜將軍與劉璉行至吳璉謂人曰吾聞張融與惠曉並宅其間有水必應異味遂命駕往酌而飲之曰飲此水則鄙吝之萌盡矣惠曉後遷竟陵王長史或謂曰長史貴重不宜妄自謙退答曰我性惡人無禮不欲以無禮處人又曰貴人不可卿而賤者乃可卿人生何用立輕重於懷抱終身常呼人官位以吏部為輔國南交州刺史何點常云

陸惠曉心如照鏡遇形觸物無不朗然王思遠恒如懷冰暑月亦有霜氣世人謂之實錄初欲用惠曉為侍中以形短小乃止有三子僚任倅各有美名

王融字元長琅邪人祖僧達父道琰廬陵內史融少而神明警慧博涉有文才舉秀才自晉安王叅軍遷祕書監中書郎永明末世祖欲北伐使毛惠秀畫漢武北伐圖融因此上疏并張北侵之議圖成上置琅邪城射堂壁上遊幸觀焉初世祖宴芳林園飲令融為曲水詩序

舉世稱之後遷中書郎嘗撫心歎曰為爾寂寂鄧禹笑
殺人及北虜動竟陵王子良拔融平朔將軍以文藻捷
速子良特相友善融躁於名位自恃人地三十內望為
公輔嘗詣王僧祐遇沈昭略素未相識昭略顧眄謂主
人曰是何年少融殊不平謂曰余出於扶桑入於濛谷照
耀天下何人不知而卿有此問昭略曰不知許事且食
蛤蜊融曰方以類聚物以羣分君長東隅居然應嗜此
族其高自標置如此世祖疾篤子良侍醫藥在殿內太

孫未入融乃戎服坐省閤口斷東宮仗不得進欲矯詔
立子良上既蘇召太孫入殿朝事委高宗融乃去戎服
坐省中歎曰公誤我鬱林即位十數日使中丞孔稚珪
奏收下廷尉誅之年二十七文集行於世

謝朓字元暉陳郡陽夏人祖述吳興太守父緯散騎常
侍朓有美名文章絕世起家豫章王東閣祭酒累至吏
部郎善草隸長於五言詩沈約常云二百年來無此作
也敬皇后遷祔山陵朓撰哀策文齊世莫有及者後江

祐與弟祀及劉渢劉晏同候朓朓曰可謂帶二江之雙
流以嘲弄之祐轉不堪至是構而害之詔暴其過惡收
付廷尉又使御史中丞范岫奏收朓下獄死時年三十
六

孔稚珪字德璋會稽山陰人祖道隆位侍中父靈產晉
安太守罷歸奉道於禹井山中立館明解星文太祖問
沈攸之事言其必敗遷為光祿大夫餉白羽扇素隱几
曰君性好古故遺古物稚珪少好學有美譽起家太祖

記室與江淹對掌辭筆初江左用晉世張杜律二十卷
稚珪刪注修改與竟陵王議務在從輕曰仲尼有言古之
聽獄者求所以生之今之聽獄者求所以殺之與殺不辜
寧失有罪則斷獄之職古所難矣珪表上律文二十卷國學
置律助教依五經例策試上高第便擢用之稚珪風韻
疎清不樂世務居宅營小山憑几獨酌多飲七八斗旁
無雜事門庭之內草萊不剪而多蛙鳴人問之曰欲為
陳蕃乎稚珪笑曰我以此當兩部鼓吹何必効蕃王晏

嘗鳴鼓吹候之聞羣蛙鳴曰此殊聒人耳珪曰我聽鼓吹殆不及此晏甚有慚色永元二年起為都倉尚書珪疾東昏屏除以牀輿走乃疾甚而卒

崔惠景字君山清河東武城人也父系之司州別駕惠景為國子生仕宋至寧朔將軍齊受禪封樂安侯世祖即位進冠軍將軍東昏立遷輔國將軍初徐世標專權惠景備員而已及東昏誅舊臣宿將不得自安明年裴叔業以壽春降魏即授惠景平西將軍往壽陽軍頓白

下將發帝長圍屏除出瑯琊城送之帝戎服坐城樓上
召景惠景單騎進圍內纔交數言拜辭而去既出至廣
陵北數十里召會諸軍頓軍廣陵停二日便濟江將衆
襲京口江夏王寶元內應之合二鎮兵力奉寶元向京
師軍到查硯竹塘人萬副兒善射能捕虎投說惠景曰
今平路皆為臺軍所斷宜從蔣山龍尾上出其不意惠
景從之遣人自西巖夜下鼓叫中臺軍驚散帝遣將軍
左興盛率軍拒北籬門便退走惠景引軍入樂遊苑突

進北掖門長圍逼內東府而石頭白下新亭皆奔惠景
使擒興盛於淮渚荻舫中殺之燒蘭臺府署為戰場稱
宣德太后令廢帝為吳王帝密召豫州刺史蕭懿軍主
胡松李居士數千人自採石濟岸過頓越城舉火臺城
中鼓吹稱慶惠景使子覺將兵渡南岸合戰覺軍大敗
赴淮死覺單馬退皆詣城降惠景乃與腹心人潛至蠡
浦為漁人所斬以頭內鮑藍中擔送京師年六十三先
是東陽女子婁逞變服詐稱丈夫粗知圍棊解文義徧

遊公卿門仕至揚州議曹從事事方泄明帝令東還始作婦人服歎曰有如此伎還為老姥豈不惜哉此人妖也陰而欲為陽事不果故泄敬則遙光顯達惠景之應也

丘靈鞠吳興烏程人祖系祕書監靈鞠少好學善屬文舉上計為東州辟從事累至東觀祭酒叅軍掌國史靈鞠曰人居官願遷使我終身為祭酒不恨也永明二年為驃騎不樂武弁改為常侍性好酒及臧否人物在沈

淵坐見王儉詩淵曰王令文章大進靈鞠曰何如我未
進時也靈鞠宋時文名甚盛入齊拜車騎長史卒又著
江左文章錄序起元興訖元熙文集行於世

檀超字悅祖高平金鄉人祖宏宋瑯琊太守超少好文
學放誕任氣解褐為西州曹掾累至國子博士自比晉
郝超言高平有二超又謂人曰猶覺我為優也建元二
年初置史官以超為驃騎記室江淹掌史職上表立條
例開元紀號不取宋年封爵各詳本傳無假年表立十志

律歷禮樂天文五行郊祀刑法藝文依班固朝會輿服
依蔡邕司馬彪州郡依徐爰百官依范曄合州郡班固
五星載天文日蝕載五行改日蝕入天文志以建元為
始帝女體自皇宗立傳以備甥舅之重又立處士烈女
等傳超史功未就而卒官江淹成之撰猶不備也時豫
章熊襄著齊典上起十世其序曰尚書堯典謂之古書
則附所述通謂之齊書名為河洛金櫃

衡陽元王道度太祖長兄與太祖同受業於雷次宗宣

帝問二兒優劣次宗曰其兄外朗其弟內明皆良璞也
為安定太守卒於宋世祖即位追封無子以太祖第
十一子鈞為後鈞字宣禮好學常手細字書五經一部
為一卷置之巾箱中侍讀賀玠問曰殿下家有墳索何
須此蠅頭細書別藏巾箱荅曰巾箱五經檢閱且易一
更手書則永不忘諸王聞而爭效之為巾箱五經巾箱
五經自此始也

始安貞王道生太祖次兄宋奉朝請太祖即位追封為

王建武元年追封為景皇妃江氏為景皇后立寢廟於御道西陵曰修安子鳳鸞鸞即明帝

鳳字景慈宋正直郎卒追謚始安靖王改華林鳳莊門為望賢門子遙光嗣

遙光字元暉生有臂足高宗崩遺詔輔東昏為侍中中書令明於吏事見東昏虐害乃與江祐兄弟謀自樹立弟遙欣擁兵上流死荊州還喪停東府遙光見江祐遇害憂懼遂收集二州部曲於東府門召丹陽尹告以

討劉瑄為名破東冶出囚上方取罷仗闕謂之屍解仙化
焉還葬舊墓連理生其側世祖語歡諸子撰歡文義三
十卷佛道二家立教無異而學者互相非毀歡著夷夏
論又著三教論注王弼易二繫及孝經老子等

臧榮緒東莞莒人也父庸國子助教緒幼孤躬自灌園
以供祭祀純篤好學括東西二晉為一書紀錄志傳一
百一十卷隱居京口著五經序論常以宣尼生於庚子
日其日陳五經以拜之自號被褐先生初與關康之俱

隱京口四十年不出門世號京口二隱

宗測字敬微南陽人宗徵士少文之孫少靜退家甚貧
豫章王嶷徵為參軍不起測答府云何為謬傷海鳥橫
斤山木母喪身貧負土植松柏嶷復遣書請之辟為參
軍測答曰性同鱗羽愛止山壑眷戀松雲輕迷人路縱
宕巖流有若狂者忽不知老至而今鬢已白豈容課虛
責有限魚鳥慕哉永明三年詔徵太子舍人不就欲游
名山乃寫祖少文所作尚子平圖於壁上測長子賓官

在都知父此旨便求祿還為南郡丞付以家事刺史安
陸王子敬長史劉寅以下皆贈送之測無所受齋老子
莊子二書自隨子孫拜辭悲泣測長嘯不視遂往廬山
止祖少文舊宅建武二年徵為司徒主簿不就卒

吳苞亦隱士常以一壺自隨一旦謂弟子曰吾今夕當
死壺中大錢一千以通九泉之路臘燭一挺以照七尺
之屍遂亡

杜京產字景齊吳郡錢塘人杜子恭玄孫父道鞠州從

事京產好恬靜專學黃老以潔淨為心庶虛成性通和
發於天挺敏達表於自然隱太平山徵為負外散騎常
侍京產曰莊叟持釣豈為白璧所回辭疾不就年六十
四卒

徐伯珍東陽人少孤貧學書無紙常以竹葉及以鐵釘
畫地學書兼明道術宅南九里有高山班固謂之九巖
山後漢龍丘萇隱處也山多龍鬚桺栢望之五彩世人
呼為婦人巖伯珍居之兄弟四人皆白首世呼作四皓

俱年八九十卒

武陵邵榮興八世同居建武三年明帝表其門閭

義興吳達之嫂亡無以葬自賣為力夫以營棺塚建元三年詔表門閭

樂頤之字文德南陽人世居南郡少性至孝養母甘厚湘州刺史王僧虔引為主簿聞僚佐非人棄官而去初吏部郎庾杲之常候頤之為設食唯枯魚菜菹杲之曰我不能食此母聞之自出常膳魚羹數種杲之曰卿過於

茅季偉我非郭林宗仕至郢州中從事

江泌字士清濟陽考城人父亮之貧外郎江泌少貧晝日則斫廩為業夜乃讀書隨月光先斜則握卷昇屋性行仁義衣弊虱多以綿裹置壁上恐虱饑死乃復置衣中食菜不食心以其有生意也為國子助教牽車至染烏頭見一老翁步行下車載之自徒步而歸建武中卒

紀僧真丹陽建康人因蕭慧開之言故請事太祖太祖用為冠軍參軍僧真夢蒿艾生滿江驚覺以白太祖太

祖曰詩人採蕭蕭艾也蕭生斷流御勿言也其見親如此太祖初在淮陰治城得一錫趺長數尺下有篆文莫能識之僧真曰何須更辯文字久遠之物九錫之徵也太祖在淮陰令僧真視上手跡學署之至是報答書疏皆付僧真上觀之笑曰我亦不能辯太祖拜中書舍人封新陽縣男上臨崩令典詔勅為人有儒雅之風世祖常目送之笑曰人生何必計門戶紀僧真堂堂貴人所不能及於諸權要寔得顧盼母葬開基得兩頭蛇五

色明帝即位以僧真歷朝驅使出為廣陵內史卒

茹法亮吳興武康人宋大明中出身為小吏齊太祖用為冠軍府叅軍世祖即位為中書通事舍人與呂文顯並以姦佞諂事武帝東昏立出法亮為大司農中書勢利之職法亮不樂去固辭不受既而代人已到法亮垂涕而去卒官

呂文顯臨海人與茹法亮等迭出入為舍人並見親幸建元永光之世至尚書右丞少府卒

北魏

元魏匈奴種也姓拓拔氏披髮左衽亦呼之為索頭虜
魏自什翼主始治平城猶逐水草無城郭未始土著立
居處至佛狸破涼州黃龍徙其居民大築郭邑截平城
四角起樓女牆不施屋城又無壘南門外立二土闕闕
內立廟四門各隨方色凡五廟一世一間瓦屋其西立
土社佛狸所居雲母等殿又立重屋居其上太子宮在
城東亦開四門妃妾住土屋婢使千餘人織綾錦販賣

逐利太官八十餘窖窖貯四五千斛城郭繞宮悉築為坊大者四五百家城西有祠天壇立四十九木人長丈許白幘練裙嘗以四月四日殺牛馬祭於城西三里刻石寫五經及國記也佛狸置三公太宰尚書令僕射侍中與太子決國事諸曹軍府悉署官貲皆使通知胡漢語以為傳譯蘭臺置中丞御史知城內事

泰始五年萬民禪位子宏自稱太上皇宏立號延興元年至六年萬民死謚獻文皇帝改號承明元年即宋元

徽四年也丁巳歲改號太和元年宏聞齊太祖受禪其
冬使丹陽王劉昶為太師來寇司州齊遣車僧朗使北
虜虜問僧朗曰齊輔宋日淺何故便登天位僧朗曰虞
夏登庸親當革禪魏晉匡輔貽厥子孫豈二聖促促於
天位兩賢謙謙以獨善事宜各異寧得一揆苟曰事宜
故屈已應物虜又問曰齊王有何功業僧朗曰主上聖
性寬仁天識弘遠大定凶黨戮力佐朝三十餘年經綸
夷險十五六載此功可謂極矣世祖即位虜使李道固

報聘世祖於玄武湖水步軍講武登龍舟引見之自此
歲使來往疆場無事自佛狸已來稍漸華典平城南五十
里有索干水定襄界世號為索干都土氣寒凝六月雨
雪遂都洛仍使蔣少游窺京師宮殿楷式而去九年將
議遷都十年世祖使司徒叅軍范雲蕭琛北使宏在西
郊祠天壇處以繩相交結絡紐木枝棖覆以青繒形製
平圓下容百人坐謂之為繖一云百子帳於此下宴飲
朝臣及齊使宏皆自應接甚重齊人宏謂左右曰江南

多好臣宏侍中李元凱對曰江南多好臣數歲一易主
江北無好臣百年不易主宏大慙十一年宏遣露布并
遺世祖書稱南入世祖廣召募會世祖崩宏聞乃退師
太和十七年八月使持節安南大將軍行尚書符騰詔
皇師電擊旌旗南指誓清江稷志廓衡霽會行人審知
彼有人故以春秋之義聞哀寢伐爰敕有司輟鑾止輅
故以往示并遣使弔齊問諱隆昌元年齊遣使劉劭等
聘宏宏是歲徙都洛陽改姓元氏宏聞齊高宗立非正

嗣乃自率大衆分寇司徐梁豫等四州齊建武二年春也齊遣王廣之等禦之宏率衆至壽陽軍中有黑氍毹行殿容二十人坐輦邊皆三郎曷刺真槩多白真氍毹騎為羣前後相接出軍皆烏漆楯槩綴以黑蝦蟆幡牛車驢駱駝等不攻城登八公山賦詩而去宏納馮太后兄昌黎王馮莎二女大者為昭儀小者為皇后生太子詢詢意不樂思歸桑乾私置馬三千匹於河陰皇后召而執之告宏宏怒徙詢於無鼻城河橋北二十里尋殺之

以庶人禮葬遂立大馮為皇后立恪為太子是歲太和二十年也

四年宏大舉向南陽將破雍州以三十六軍前後相繼衆號百萬其諸王軍朱色鼓公侯綠色鼓伯子男黑色鼓並有輦角吹沸天地使咸陽王禧圍南陽自新野皆陷之宏縛新野太守劉思忌問曰何不早降忌曰寧為南鬼不作北臣乃殺之尋破崔惠景於鄧進樊城臨水而去宏疾崩謚孝文皇帝是年王肅在虜為制官品百

司一如中國凡有九品各有二肅初為道人奔虜自說家被誅戮宏為流涕乃以第六妹妻之即彭城公主也封肅平原公為起宅舍

宏太子恪立號景明元年即齊永明二年也初佛狸之朝討反胡於長安有道人射殺虜三郎將斛浴真佛狸大怒悉毀浮圖殺道人將盡及元嘉南寇獲道人以鐵籠盛之後乃感惡疾自是敬畏乃立塔寺及宏大興佛事

蠻

諸蠻種類繁多言語不一咸依山谷布在荆湘雍郢司等五州界宋世封西陽蠻梅蟲生為高山侯田治山為威山侯梅加羊為扞山侯齊太祖即位數為寇皆討平之收其部落使戍汶陽汶陽本臨淄西界二百里中水

陸迂狹魚貫而行水白田肥桓元割為都

謹案此書各本俱云桓元

割為都考南齊書作桓溫時割以為郡元疑當作溫

南接巴巫太祖置巴州以威

靜之蠻俗衣布徒跣或堆高髻或剪髮兵仗以金銀為

飾使弩射

東南夷

東夷高麗國與魏虜接界太祖建元元年進封號以高麗王璉為驃騎大將軍樂浪公如故三年使貢方物璉年百餘歲乃卒隆昌元年高雲立為高麗王樂浪公征東大將軍其官位有長史司馬參軍之屬拜則中一脚坐則跪行則走以為恭敬國有銀山採為貨并人參貂皮重中國綵繡丈夫衣之亦重虎皮

百濟升辰之國起晉世受蕃爵自置百濟郡在高麗東北齊建元二年其王弁都使貢方物永明二年魏虜征之大破百濟王弁都新羅國三韓種也

倭國在帶方東南大海中島上漢末以女人立為王

林邑國在交州南海行三千里北連九德郡秦朝故臨邑縣也漢末稱王晉太康五年使人貢獻宋太初元年林邑王范陽邁母初生夢天人以金席藉之光色奇異夷人謂金之精者為楊邁若中國云紫磨者故以名之

王服天冠如佛冠身披香纓絡國人兇麤善鬪吹海螺
為角人皆裸形有靈就鴛鳥知人將死集其舍食死人肉
盡飛去乃以火焚其骨粉於水中謂之水葬其大姓號
婆羅門嫁娶必用八月女先求男賤男而貴女以婆羅
門引臂握手相付呪曰吉利吉利為成禮色黑為上

扶南國在日南郡之南大海西灣中廣三千餘里有江
向西流入海先有女人為王名柳葉後為激國人混填所
破降為妻而遂治其國子孫相傳晉末始通職貢其後

王姓僑陳如名闍耶跋摩晉惠帝永明二年闍耶始因
天竺道人那伽仙而遣使於中國奉表獻金鏤龍王座
像一軀白檀像一軀牙像一軀牙塔二軀古貝二雙瑠
璃蘇釭二口瑇瑁拌一枚詔回紫絳地黃碧綠綾各百
匹扶南人黠慧智巧居重閣以木柵為城出大莢葉長
八九尺編此葉以蓋作屋人民亦為閣居或為大船長
八九丈廣六七尺頭尾似魚國王行乘象婦人亦然好
鬪鷄狗為戲無牢獄有爭訟者以金指鐲投沸湯中令

交取之土出芭蕉甘蔗石榴檳榔等物

蠕蠕

蠕蠕國虜塞外雜胡也編髮左衽晉世什翼珪入塞後蠕蠕逐水草居匈奴威伏西域土氣早寒所居穹廬毳帳刻木記事無文字宋世嘗言南方姓名齊者當為天子宋順帝昇明二年太祖輔政遣王洪範使剋期共伐魏虜其相國刑基祗羅回表言京房讖云卯金十六草肅應王建元二年八月蠕蠕發四十萬南侵去平城七

百里於燕然山縱獵而出後二年三年頻獻獅皮永明
元年王洪範始還京師經途三萬餘里後十年為丁零
胡所攻蠕蠕南徙

河南氏羌

河南國匈奴種也漢建武中匈奴婢亡匿在涼州界
雜種數千人虜名奴婢為資一謂之賁虜鮮卑慕容廆
庶兄吐谷渾與廆分爭子孫領其部落以吐渾為氏在
益州西北亘數千里其南界龍涸城去成都千餘里犬

戎有四一在青水一在赤水一在澆河一在吐屈真川
皆子弟所治其王治慕駕川初逐水草後稍為宮室初
始受爵命河南吐谷渾拾寅為持節車騎大將軍秦河
二州刺史齊太祖建元元年進號驃騎大將軍卒子易
度侯為河南王卒世子休留茂為河南王齊使邱冠先
至河南拜授為休留茂推隆深谷殺之丘冠先字元通
吳興人晉吏部郎傑六世孫也

氏楊氏興苻氏同出略陽漢世居仇池建安中有百頃

氏王晉代有楊茂搜宋令裴方明代氏剋仇池王
楊文德加武都王兼仇池公太祖即阼又封之

宕昌羌種各有酋豪領部落在岷隴間宋末宕昌王梁
彌機為河涼二州刺史隴西公建元元年太祖進號鎮
西將軍卒子孫為宕昌王使求雜書帝以五經集論等
賜之俗重虎皮以之送死國中以為賀

建康實錄卷十六